

Datum: 15.4.2026., Sarajevo  
Broj: 01-01-15-04/26  
Bosna i Hercegovina  
Federacija Bosne i Hercegovine  
Kanton Sarajevo  
**Grad Sarajevo**

- n/r gradonačelniku Grada Sarajeva, g. Samira Avdića,
- n/r vijećnica i vijećnika Gradskog vijeća Grada Sarajeva

**Predmet: Zahtjev za izmjenu i dopunu prijedloga Regulacionog plana „Kvadrant C – Marijin Dvor“ radi zaštite sigurnosti studenata, akademskog prostora i javnog interesa**

Poštovani,

Studentski parlament Univerziteta u Sarajevu, kao legitimna predstavnička organizacija svih studentica i studenata Univerziteta u Sarajevu, ovim putem izražava punu podršku stavu i zaključku Senata Univerziteta u Sarajevu povodom prijedloga Regulacionog plana „Kvadrant C – Marijin Dvor“ upućenog na usvajanje Gradskom vijeću, te smatra ovakav prijedlog potpuno neprihvatljivim.

Predložena planska rješenja ne predstavljaju samo pitanje urbanističkog oblikovanja prostora niti isključivo imovinsko-pravno pitanje, već neposredno zadiru u svakodnevni život, sigurnost i pravo na nesmetano obrazovanje hiljada studentica i studenata Univerziteta u Sarajevu. Prostor Kampusa i fakultetskih objekata koji su obuhvaćeni ovim planom nije apstraktna površina, već prostor u kojem se svakodnevno odvijaju nastava, laboratorijske vježbe, konsultacije, ispiti, naučnoistraživački rad i studentske aktivnosti.

Takvo rješenje, koje je od strane Zavoda za planiranje razvoja Kantona Sarajevo upućeno Gradskom vijeću, direktno ugrožava sigurnost studentica i studenata, nastavnog i administrativnog osoblja, naročito imajući u vidu intenzivno svakodnevno kretanje između objekata Prirodno-matematičkog i Mašinskog fakulteta, kao i drugih sadržaja unutar univerzitetskog prostora. Za studente, ovo nije pitanje samo prostornog planiranja. Ovo je pitanje sigurnog dolaska na predavanja i vježbe, nesmetanog prelaska između zgrada, dostupnosti nastave, očuvanja zelenih površina kao prostora boravka i rada, te zaštite akademskog ambijenta koji mora ostati usmjeren obrazovanju, istraživanju i razvoju, a ne dodatnoj saobraćajnoj opterećenosti i betonizaciji prostora.

Studentski parlament Univerziteta u Sarajevu posebno naglašava da univerzitetski kampus mora ostati prostor koji je prilagođen studentima, uključujući i studente sa invaliditetom, te da svaki projekat ovog tipa mora uvažavati stavove Univerziteta u Sarajevu, kao institucije čije mišljenje u sličnim studijama i vještačenjima traže i pravosudne i sve druge institucije uzvažavajući stručnost uposlenika Univerziteta, i studentske populacije. Smatramo da nijedan razvojni projekat ne može biti opravdan ukoliko kao posljedicu ima narušavanje uslova studiranja i ugrožavanje fizičke sigurnosti članova i budućih članova akademske zajednice.

Posebnu osjetljivost ovog pitanja dodatno pojačava činjenica da su studenti i akademska zajednica i ranije bili suočeni sa tragičnim događajima u neposrednoj blizini glavnih saobraćajnica, zbog čega svako plansko rješenje koje povećava frekvenciju saobraćaja uz univerzitetski prostor nužno izaziva ozbiljnu zabrinutost. Upravo zato smatramo da je obaveza svih nadležnih organa da pri odlučivanju postupe s dodatnim stepenom odgovornosti i opreza, imajući u vidu sigurnost studentica i studenata kao prioritet.

Ističemo da studenti **nisu** protiv razvoja grada Sarajeva, niti protiv novih investicija i unapređenja urbanog prostora. Naprotiv, studenti podržavaju planski i održivi razvoj grada. Međutim, takav razvoj mora biti zasnovan na zakonitosti, stručnosti, javnom interesu i punom uvažavanju potreba institucija od posebnog društvenog značaja, među kojima je Univerzitet u Sarajevu.

S tim u vezi, Studentski parlament Univerziteta u Sarajevu poziva sve nadležne institucije i nosioce javnih funkcija da u postupku razmatranja prijedloga Regulacionog plana „Kvadrant C – Marijin Dvor“ uvažavaju argumente Univerziteta u Sarajevu i Studentskog parlamenta, te da ne podrže rješenje koje ugrožava sigurnost studentica i studenata, narušava funkcionalnu cjelinu univerzitetskog prostora i odstupa od dugoročne vizije Kampusu kao zelene, otvorene i pješački orijentisane zone znanja, istraživanja i inovacija.

Studentski parlament Univerziteta u Sarajevu ovim putem daje jasnu podršku prijedlogu da se:

- prijedlog Regulacionog plana vrati nosiocu izrade na dodatne konsultacije, uz puno uvažavanje stavova Univerziteta u Sarajevu i predstavnika studentske zajednice.

Ujedno pozivamo da se prije donošenja konačnih odluka osigura dodatni prostor za konsultacije sa Univerzitetom u Sarajevu, Studentskim parlamentom Univerziteta u Sarajevu, i drugim relevantnim akterima, kako bi konačno rješenje bilo zakonito, stručno utemeljeno, održivo i prihvatljivo za sve. Zaštita univerzitetskog prostora nije samo zaštita imovine. To je zaštita sigurnosti, dostojanstva i budućnosti obrazovanja u Sarajevu. U tom smislu, uvjereni smo da je obaveza svih odgovornih institucija da donesu odluku koja će biti u interesu sadašnjih i budućih generacija studentica i studenata, ali i u interesu razvoja Sarajeva kao univerzitetskog, naučnog i društvenog centra.

**Ukoliko se stavovi studenata i Univerziteta nastave zanemarivati, izvjesno je da će studentska zajednica koristiti sva legitimna i demokratska sredstva građanskog djelovanja kako bi zaštitila sigurnost studenata i univerzitetski prostor kao javno dobro.**

S poštovanjem,

**PREDSJEDNIK STUDENTSKOG PARLAMENTA  
UNIVERZITETA U SARAJEVU**

*Ali Jusović*

*Dostaviti:*

- *Sredstvima javnog informisanja u Bosni i Hercegovini*
- *Rukovodstvu, vijećnicama i vijećnicima Gradskog vijeća Grada Sarajeva*
- *Članicama i članovima Odbora za urbanizam i upotrebu lokalnog zemljišta Gradskog vijeća*
- *Gradskoj upravi Grada Sarajeva*
- *Rukovodstvu i zastupnicima u Skupštini Kantona Sarajevo*
- *Vladi Kantona Sarajevo*
- *Ministarstvu za nauku, visoko obrazovanje i mlade Kantona Sarajevo*
- *Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo*
- *Zavodu za planiranje razvoja Kantona Sarajevo, rukovodstvu i vijećnicima Općinskog vijeća Općine Novo Sarajevo*
- *Načelnici Općine Novo Sarajevo*
- *Članicama Univerzitetu u Sarajevu*
- *Upravnom odboru Univerziteta u Sarajevu*
- *U dokumentaciju Senata Univerziteta u Sarajevu*
- *a/a*